

Samostalna zastupnica - Arijana Memić

Samostalna zastupnica - Elza Gaković

Sarajevo, 23.12.2025. godine

ZA:

Vlada Kantona Sarajevo

Ministarstvo za rad, socijalnu politiku, raseljena lica i izbjeglice Kantona Sarajevo

INICIJATIVA

Pokrećemo inicijativu za uspostavljanje Protokola saradnje sa SOS Dječjim Selima u Bosni i Hercegovini u cilju sistemske podrške djeci i mladima koji izlaze iz sistema javne brige.

OBRAZLOŽENJE

Djeca koja odrastaju bez roditeljskog staranja nose teret koji ne biraju. Njihovo djetinjstvo često se odvija unutar institucija, a punoljetstvo umjesto slobode i sigurnosti za neke znači neizvjesnost, strah i usamljenost. U trenutku kada navršše 18 godina, vrlo često se nađu pred izazovima koje životni put pred njih stavlja.

Upravo iz tog razloga podnosimo ovu inicijativu za uspostavljanje formalnog Protokola saradnje između nadležnih institucija i SOS Dječjih Sela, kao dokazanog i dugogodišnjeg partnera u brizi o djeci bez roditeljskog staranja.

Razlozi za uspostavljanje Protokola su višestruki a mladi koji izlaze iz sistema javne brige suočavaju se sa nizom rizika:

nezaposlenost i ekonomska nesigurnost,

prekid obrazovanja,

stambena nestabilnost,

povećan rizik od socijalne isključenosti, nasilja i eksploatacije.

SOS Dječja Sela već imaju razvijene programe osamostaljivanja mladih, psihosocijalne podrške, mentorstva i pripreme za samostalan život. Međutim, bez jasnog i obavezujućeg protokola sa javnim institucijama, ova podrška ostaje fragmentirana i nedovoljno dostupna svima kojima je potrebna.

Cilj Protokola

Cilj ovog Protokola je da se nijedno dijete ne „izgubi“ u trenutku izlaska iz sistema, već da se osigura kontinuirana, planska i koordinisana podrška koja obuhvata: nastavak obrazovanja i stručno osposobljavanje, zapošljavanje i ekonomsko osnaživanje, rješavanje stambenog pitanja, psihološku i socijalnu podršku, mentorstvo i praćenje u prvim godinama samostalnog života.

Ključni elementi Protokola

Protokol bi, između ostalog, trebao sadržavati:
jasno definisane obaveze institucija i SOS Dječjih Sela,
ranu identifikaciju djece koja se približavaju izlasku iz sistema,
individualne planove osamostaljivanja,
mehanizme finansijske i institucionalne podrške,
praćenje i evaluaciju uspješnosti mjera.

Način na koji se društvo odnosi prema djeci bez roditeljskog staranja najbolji je pokazatelj njegove humanosti i zrelosti. Ova inicijativa nije trošak ona je ulaganje u ljude, u dostojanstvo i u budućnost.

Uspostavljanjem Protokola sa SOS Dječjim Selima šaljemo jasnu poruku:
da država ne odustaje od svoje djece onda kada im je najteže, da punoljetstvo ne znači kraj brige i da nijedno dijete ne smije biti prepušteno samo sebi.